



泉州府志

ル 5  
1213  
5



凡ル5  
1213  
巻 5



泉州府志卷十

官守志下

古今官蹟

唐

薛昱天寶中為清源大守以清德著郡人歌云郡號清源官有清德

蘇妙字觀妙南海人大曆中刺泉有惠政有白鵲來巢行春門樓妙出鵲每集車蓋州民頌歌之

薛播寶鼎人開元天寶間兄弟七人並擢進士累授殿中侍御史李栖筠常袞崔祐甫並器之祐甫

輔政拜中書舍人出爲汝州刺史坐小累貶泉州  
秦系客泉播頻往候歲時致之羊酒再累遷河南  
尹禮部侍郎

趙昌字洪祚天水人貞元間刺史鑿塘水灌田三  
百餘頃後爲尚書民追思其德名其塘曰尚書塘  
席相安定人刺州敷政興文建六曹都堂造北樓  
貞元癸酉歲邑貢士歐陽詹等八人相將薦之闕  
下設讌東湖亭修賓主禮款洽備至一時老幼來  
窺盡室盈岐閭里之士皆相告鄉學焉

薛戎字元夫寶鼎人少有學術不求聞達居陽羨

一

山江西觀察使李衡辟爲從事故相齊映代衡又  
留署職府罷歸福建觀察使柳冕表爲從事轉殿  
中侍御史會泉州缺刺史冕署戎權領州事是時  
姚南仲節制鄭滑從事馬總以直道爲監軍使誣  
奏貶泉州別駕冕附會權勢欲構成總罪使戎按  
問曲成之戎不從冕意別白其狀戎還自泉州冕  
盛氣據衙而見賓客戎歷東廂從容而入冕度勢  
未可屈徐起一揖而退又構其罪以狀聞置戎于  
佛寺環以武夫恣其侵辱如是累月誘令成總之  
罪竟不動搖杜佑鎮淮南知戎寃乃上表發書論

冕戎難方解遂辭職歸後召拜侍御史歷浙江觀  
察使

趙榮泰和中刺史郡中有通淮橋其東南曰通淮  
門榮於郡郭之東南隅潴洩江水以肥沃南洋之  
田民便之因其氏曰天水淮

姜公輔自南人爲唐相因論唐安公主造塔忤德  
宗謂其賣旨售名左遷未幾貶泉州別駕築室于  
南安九月山與秦系相近順宗立拜吉州刺史未  
之官卒憲宗時贈禮部尚書宋蘇紳大書姜相峰  
刻于九日山之石礎

馬總字會元扶風人貞元中謫泉州別駕篤學不  
妄交遊雖吏事倥偬書冊在前用儒飾吏廉清不  
撓歷官安南都護戶部尚書謚曰懿

趙頤正開元末爲晉江縣令鑿溝通舟楫至城下  
民德之

五代

詹敦仁字君澤五代光州固始人遷閩隱於仙遊  
植德山下上閩王昶書勸昶命參決軍事強以  
袍笏不受以詩謝之有周粟縱榮寧忍食葛盧頻  
顧謾勞思之句居泉山杜門不出節度留從效辟

至復力辭之乃求監小溪場請置縣遂爲清溪令  
政尚德惠舉王直道以自代愛佛耳山峭絕可耕  
可廬卜築其上號所居曰清隱自爲記從效遺之  
書稱曰清隱先生後人取書中有崇待篤信之語  
名其里曰崇信

宋

韓國華字光弼安陽人太平興國二年進士以太  
常少卿出知泉州質性純直治有時譽子琦郡舍  
所生也後人邇所自出名府治之堂曰忠獻  
陳靖莆田人太宗真宗朝議均田法三司阻之不

果行累官知泉州重農愛民郡人德之

方慎言字應之莆田人天聖元年知泉州會歲饑  
大發官廩賑貸尤恤鰥寡孤獨生子有以方兒爲  
名者

沈周字望之錢塘人康定元年守泉州爲治簡易  
訟有可已者輒使歸思之獄以故少泉舊多盜日  
暮市門輒閉禁民勿往來及周至除其禁而盜亦  
止

蔡襄字君謨仙遊人至和嘉祐間兩知泉州威惠  
兼行民畏而愛之州之東有萬安渡涉海而濟往

來畏其險襄立石爲梁長三百六十丈種蠶於礎  
爲固又植榕七百里以庇道路泉人刻碑記德立  
祠祀焉祠在橋南今存

黃伸邵武人嘉祐六年進士知泉州建學校芝生  
于梁改建州歷官司農卿

陳侁字君舉沙縣人通判蔡州嘗以疾在告力爭  
枉獄免死者五人熙寧八年召知開封府屬新法  
行請外知泉州以治行聞召見改惠州元豐五年  
復知泉州舊法番商至必使詣廣東否則沒其貨  
侁請立市舶司于泉詔從其議以朝議大夫致仕

### 贈特進

陳覺民仙遊人熙寧初登第元祐中知漳州建州  
福州所至有治行崇寧五年改知泉州時有司建  
言欲權六郡酷覺民陳五不可且移書約他郡同  
請其事遂寢遷本路提刑風采巖峻未嘗與僚屬  
妄交一談人甚憚之

陸藻侯官人宣和中爲郡守招致郡中謝事五老  
賦詩贈之曰五老三白五十七俱生仁祖承平時  
名齊廬阜久傳世身異嵩山深採芝兄蘊同時爲  
建寧守俱有名

梁巖老永福人政和中金丹犯闕奉使虜中被幽  
荒寺日給以飲食食餘輒私晒之復陰漬其壁既  
而壁壞挾餘糧夜遁晝伏竟全節歸高宗嘉嘆建  
炎元年除直秘閣知泉州方欲大用之未幾卒士  
大夫惜焉

孫夢觀字守叔慈溪人歷官太宗正丞兼屯田郎  
中將作少監以言事忤當路者出知泉州兼提舉  
市舶重名節蠲租省罰有循良之譽後知建寧府  
卒其家莖敗屋數間而已

劉子羽字彥修崇安人宣和間與父鞫守真定金

不能拔而去田是顯名紹興六年知泉州在郡二  
年政多澤民民愛之如父母

趙鼎字元鎮聞喜人登崇寧五年進士歷遷司勳  
郎官嘗上言罷王安石配饗後以忤旨出奉祠歷  
知洪州召拜參知政事為給事中勾濤所詆出知  
紹興秦檜徃餞鼎不為禮檜憾之有旨召鼎鼎至  
越勾祠檜惡其逼已徙知泉州年餘安撫泉民檜  
又諷御史中丞王次翁論鼎治郡廢弛命提舉洞  
霄宮鼎自泉歸復上書言時政檜忌其復用諷次  
翁又論其乾沒府錢十七萬緡安置潮州



陳康伯字長卿弋陽人紹興十六年知泉州時海寇間作朝廷遣劉寶成閔逐捕康伯以上意招懷盜多出降籍爲兵久之不逞者陰倡亂康伯訊得實論殺之州以無事後歷官尚書右僕射同中書門下平章事高宗謂其靜重明敏真宰相孝宗稱其器量從容可比謝安

葉廷珪字嗣忠甌寧人紹興十八年以兵部郎中出知泉州爲政清靜簡易時通淮河塞廷珪疏引入城語州之士曰通此巽水十年當出大魁至期梁克家應之尤工詩喜編纂有海錄雜事碎事傳

于世郡人祠于清源下洞

趙令衿宋宗室也紹興二十一年知泉州博學能文在郡留意教養建堂全祀姜公輔秦系於九日山下民感其化官至明州觀察使

辛次膺萊州人爲吏部郎時以劾秦檜妻兄王仲嶷等不法求去除直秘閣湖南提刑未幾罷奉祠閱十六年其貧無求檜死起知泉州爲政清靜務先德化人安其不煩移福建帥丁母憂乞納祿爲人孝友清介立朝蹇諤仕宦五十年無絲毫挂吏議云

范如圭子伯達建陽人登進士第歷校書郎兼史館校勘嘗以書責秦檜曲學背師忘仇辱國之罪謁告杜門十餘年紹興二十九年知泉州南外宗官寄治郡中挾勢爲暴占役禁兵以百數如圭裁之以法宗官大沮恨密譖之遂以中旨罷領祠陳俊卿字應求興化人隆興二年以寶文閣待制知泉州初俊卿爲州觀察推官服勤職業同僚宴集恒謝不往民受實惠秦檜惡其不附已改南外睦宗院教授後累遷叅知政事平生孝友忠敬清嚴好禮在朝正色危論侃侃無所避焉

趙子滿乾道二年知泉州吏有掠民女爲妾者其妻妬悍磔之貯以缶抵其兄興化椽廨中妾父詣郡訴吏不能決子滿廉知密令人往興化掩取之果得缶遂成獄其精明多類此

王十朋字龜齡樂清人由太學試策高宗廷擢第一歷官吏部侍郎力辭出知饒州繼知湖州戶部責虛逋三十四萬命吏持券往取不聽即請祠去乾道四年起知泉州割俸錢創貢闈布上恩恤民隱士之賢者詣門以禮致之朔望會諸生學宮講經僚屬間有不善反復告戒使之自新民輸租俾

自槩量訟至溫詞曉以理義多退聽者去之日老  
穉攀留越境以送思之如父母焉後以龍圖閣直  
學士致仕州人建梅溪祠祀之朱熹稱十朋踈暢  
洞達如青天白日磊落君子也

汪大猷字仲嘉鄞縣人乾道七年以敷文閣待制  
知泉州時毘舍邪嘗掠海濱歲遣戍防之勞費不  
貲大猷作屋二百區遣將留屯寇不復犯久之戍  
兵以真臘大賈爲毘舍邪執之大猷曰毘舍邪面  
黑如漆語言不通此非也遂遣之故事蕃商與人  
爭鬪非折傷罪皆以牛贖大猷曰安有中國用島

夷俗者既在吾境當用吾法三佛齊請鑄銅瓦三  
萬詔泉廣二州督造大猷奏法銅不下海中國方  
禁銷銅柰何爲其所役卒不與進敷文閣直學士  
留知泉州

程大昌字泰之休寧人試館職爲祕書省正字歷  
官權吏部尚書時方行中外迭更之制力請出外  
遂出知泉州有惠政江州賊沈師作亂戍將蕭統  
領戰死閩部大震大昌趣統制裴師武討之賊遂  
遁去遷知建寧府徙知明州致仕卒大昌傳學善  
考究著述傳於當時

趙必愿宋宗室汝愚孫也以華文閣直學士知泉州罷白土課及免差吏權鐵諷諸邑行義役秋旱力講荒政乞發倉賑救多所全活必愿爲政平易以近民忠信以厚俗尤留意武事申明左翼軍節制事宜卒贈光祿大夫

林枏莆田人淳熙十二年知泉州以清德律貪除諸色無名科歛訟牒盈庭剖決不滯一時豪強歛跡莆泉密邇親故不敢干以私後帥閩卒民立祠以祀

顏師魯龍溪人第進士歷官監察御史嘗論除職

帥藩者平時交結權倖一紆郡紱輒掎尅以厚苞苴故昔以才稱今以貪敗高宗納其疏袖中行之後遷吏部尚書抗章請老淳熙十六年以龍圖閣直學士知泉州始至即蠲舶貨諸商賈胡尤服其清爲政專以恤民爲心郡人塑像祀之

倪思字正父歸安人嘉泰元年知泉州新學校修城郭繕器械訓士卒浚河渠造橋梁葺候館立養濟院百廢俱興民不告擾真德秀將守泉貽書問政思告以母崇宴觴母豔琛貨靜以安民儉以化俗思歿有年德秀爲祠而記之曰泉守多矣不求

祠而民祠之有三人焉蔡襄王十朋其一思也  
鄒應龍字景初慶元二年進士嘉定三年守泉州  
修舉廢墜興學右文郡城故卑薄應龍以賈胡簿  
錄之貲請于朝而大修之城始固又即明倫議道  
堂間建六經閣德濟門外筍江下流舊以舟渡始  
造石橋長一百五十餘丈翼以扶欄居民行旅便  
之以擬萬安橋焉歷官簽書樞密院事

真德秀字景元浦城人嘉定十年知泉州時番舶  
懼苛征至者歲無三四德秀至郡首寬之遂歲增  
三十六艘輸租令民自槩聽訟惟揭示姓名人自

請聽治泉多大家梗法務在痛繩海寇作亂官軍  
敗衄乃祭兵死者親授士卒方畧擒之紹定中再  
知州事迎者塞路深村百歲老人亦扶杖以出歡  
聲雷動諸邑二稅嘗預借至六七年德秀入境首  
禁之有累月不解一錢者郡計稍逼或咎其寬恤  
太驟德秀謂民困如此寧身代其苦決訟自卯至  
申未已或勸嗇養精神德秀謂無以惠民僅有政  
平訟理事當勉耳時南外宗官在泉者三千三百  
餘人以上中下末四等給應德秀多方區處而歛  
不傷民其他善政尤多所著心政經勸諭文今猶

傳誦

宋鈞莆田人嘉定十二年知泉州舊有銀礦令以其銀代台信邵武建昌四州上供而以四州所產紬綿絹帛折還支散官兵後銀礦閉廢四州折還紬絹皆紕惡又積欠大爲民病鈞愷奏乞各從初賦從之蠲逋負紓下戶創局講荒政所活萬計代真德秀善繼其政民戴而祠之

游九功寶慶元年守泉在郡以清嚴稱留心教化撥五廢寺田于石井書院以廩學徒南安令毛進簿謝觀作新學舍考成之日九功率僚屬諸生周

旋廟廷以慶其能

李韶字元善紹定四年通判泉州忠厚純實郡守游九功素清嚴獨異顧韶端平初遷右正言上封事數千言理宗嘉其真有愛君憂國之心以寶章閣直學士知泉州簡淡冲粹州人戴之

趙汝騰宋宗室寶慶進士累官端明殿學士知泉州及南外宗正司事皆有善政朝廷賜田宅以旌其廉卒謚忠靖

顏頤仲師魯之孫淳祐二年以侍郎出知泉州罷溪糴減商稅除監賊教宗室開東湖民甚德之歷

官吏部尚書

黃彥臣龍溪人治平進士倅泉州以清惠聞後官朝散大夫子願尉晉江造轎以遺彥臣惡其侈焚之仍移書切責

喬維岳字伯周太平興國三年以通判知軍州事時盜起仙遊衆十餘萬攻郡城城中兵僅三千勢甚危急監軍何承矩欲盡屠其民焚府庫以道維岳抗議堅守既而轉運使楊克讓率兵破賊圍始解事聞下詔褒之

杜孝淵字全一建炎六年通判泉州時亂卒恣橫

孝淵至遂爲帖息提舉市舶接收舶貨吏循例取腦一匣以納孝淵厲聲曰公則官物私則商貨何例之有斥反之邵邦建白于朝曰材術疏通吏事詳練協贊郡治綏靖兵民千里帖然內外安堵人以爲實錄

韓習字勝非潁昌人億之孫也紹興間通判泉州攝郡事會密院起禁卒他戍卒憚遠涉既出城欲倒戈爲亂時劉寶提偏師赴臨漳捕茶寇習知其謀密以告寶假劉兵百餘設伏以俟其變亂卒甫入譙門伏兵四起卒就擒戮其渠魁復遣往戍一

郡以寧秩滿寓居于泉

游酢字定夫建陽人以博士簽書泉州判官以道學淑士心以公勤治吏事時方修祠館編民困於征調所至騷然酢處之裕如民不勞而事集擢監察御史

傳知柔宣和進士知龍巖縣素有威名調泉州簽判帥臣檄捕海寇知柔出幟以示寇即降終朝請即

方阜鳴字子默嘉定初任泉州簽判時真德秀爲守阜鳴嘗謂咸門刺史破家縣令此衰世事古人

惟曰豈弟君子民之父母而已德秀擊節嘆賞在官清儉秋毫不苟取每以其任晚用小爲恨

胡大正字伯誠崇安人以季父胡寅補官簽判泉州會劇賊號過海龍羅動天者逼清漳勢甚急泉與爲鄰城門晝閉忽近郊有荷斧者數十人兵捕以聞同幕請肆諸城下大正不肯書牘訊之果採樵者皆釋之郡爲蕃商之會每舶至檢視者得利不貲大正秋毫無所取

龔茂良莆田人紹興進士爲邵武司法調泉州察推以廉勤著擢右正言論列侃侃歷官禮部侍郎



叅知政事卒謚莊敏

李方子字公晦邵武人朱文公高弟嘉定七年廷對擢第三調泉州觀察推官適真德秀守泉以師友禮之郡政大小每以咨決暇則與辨論經訓至夜分不倦秩滿遷國子錄

杜純字孝錫甄城人泉州司法叅軍泉有蕃舶之饒雜貨山積時官於州者私與爲市價十不償一惟知州關詠與純無私買後事敗獄治牽繫惟關杜無與關猶以不察免且檄叅對杜憤懣陳書部使者爲訟冤關得不坐

趙崇度嘉定間提舉市舶先是海商貨至官競刮取命曰和買實不給一錢於是商舶滋少供貢缺絕崇度與郡守真德秀同心剡洗前弊罷和買鑄重征逾年舶至三倍故事歲以土物送諸貴人下洎曹吏皆厭滿崇度曰吾不能脫脂膏以市寵榮悉罷之

陳可大字齊賢仙遊人政和二年進士調泉州工曹兼右推時龍巖解死罪盜七人可大明其無辜得不死時稱神明

危雍熙寧間爲晉江令嘗築煙浦埭以捍海潮蓄

灌溉又築清洋陂自南安九溪至於高溪凡三十  
六水合流而下所灌田四千八百頃民至今德之  
傅佇字凝遠仙遊人重和元年進士授無棣主簿  
調南安縣丞歲大飢民棄妻子者相屬佇請出常  
平倉錢設安養院食之民不失所明年歲豐悉訪  
所親歸之遷知晉江縣會治戰船佇躬督其役勞  
費半他邑而事獨先辦張浚聞于朝特減磨勘二  
年除茶司幹辦公事

鄭鼎新字中實仙遊人嘉定十六年進士知晉江  
縣建問政堂輯論語繫於政者二十四章書于壁

以便省覽又建縣學文宣王廟闢尊道堂邑民立  
生祠于紫澤宮

蔡賓天聖六年知南安縣治理甚明有盜截牛舌  
者其主以聞陽爲叱去陰令屠之即有告屠牛者  
賓謂曰截牛舌者汝也訊之果服

余武弼紹興二十四年知南安縣愛民如子民德  
之恒禱祠廟祝勿遽去提點刑獄按郡民爭請乞  
留武弼以父老力乞歸養

徐鹿卿紹定六年知南安縣既至首罷無名之賦  
明版籍革預借決壅滯達冤抑邑以大治歲飢諭

民以相周之義富者樂分貧無死徙真德秀疏薦于朝尋以母喪去

黃琮字子方莆田人元符三年進士知同安縣有惠政民生祠之

陳執中字昭譽即丞相恭公祥符八年以父恕廢來知惠安縣事清謹守法門無私謁嘗有縣齋詠梅詩一首去年邊上見梅花醉眼淹留未到家今日嶺南攀折得忽驚身又在天涯後人因作見梅亭以記之

李旼蜀人張詠知益州選旼於諸生中授以文學遂知名天聖元年以大理寺丞來知惠安縣事始建學宮以教子弟其政尚簡與民休息旼之母賢而知書且精相宅之說謂縣白虎山高不利於人命旼築城隍廟於縣治東以壯青龍之勢民至今利賴焉

彭元遠長樂人紹興五年知惠安縣事時兵戈之餘民俗彫弊元遠講求利病軍需百費調度有方民不知勞舊學在邑西南隅後遷皇華驛後士病湫隘元遠爲改建于舊址及去繪像于學東廡祀之

周震紹熙三年知惠安縣有善政嘗以春月勸農  
至華林寺有詩飛廉怒息海天明十里監輿出勸  
耕隴麥低頭須雨意林花迎面笑春晴熙寮聯轡  
勤因事父老傳杯識至情及物無功慚竊廩豐年  
有願是忠誠

龔昺莆田人叅知政事茂良之子慶元四年以廢  
補知惠安縣到任增置書籍以教士子初茂良與  
史浩不合及彌遠當國修先世故怨昺亦安於退  
處不復仕

揚幹廣信人紹興十二年知安溪縣爲政以厚俗

爲本業尚教化遷建廟學邑之文風自是始盛邑  
民爲立生祠陳挺卿爲生祠頌有古人之心古人  
之貌心正而清月瑩冰壺之語

黃朴字文卿漳州人紹興二十二年知安溪縣興  
學校課農桑極意教養檄攝韶州不就乞祠去

孫昭先龍溪人紹熙中知安溪縣爲政簡易催科  
有程其於差役必親按戶籍第其先後且多方寬  
恤民感其德無所避至有先期而克者又修學舍  
躬課程斥廢刹之田以贍多士云

楊承祖龍溪人嘉泰四年任安溪知縣勞心撫字

遷循州倅邑人遮道借留見漳州通志

陳宓字師復俊卿子也與朱熹相善從黃幹遊以父任知安溪縣時府判監簿督增經總制解錢宓力辨之以爲酷政霍民持不肯應各色錢不係上供者例歸縣官吏以例進宓曰此一例字壞了許多賢士大夫命置之官帑一日有陳巖一者自斷左手次指誣兄之子宓疑之令效其舉刀狀遂詰之曰如此則餘指俱傷安得僅斷一指乃女自斷誣之耳其人屈服出縣門再拜曰公神明也歸悔而撫其姪

趙彥侯嘉定六年知安溪縣以儒術飾吏事條教詳明邑用以治

周肆弋溪人嘉定九年知安溪縣蒞官政教兼舉士宜民安當時以肆與趙彥侯皆繼前陳令以治爲立生祠金祀

顏振仲字景玉龍溪人寶慶元年知安溪縣留心民隱振刷寬濫有陽嵩嶺爲盜淵藪出沒殺掠時尉誣執平民姜某罪之案具振仲廉知其寃遂得釋

鍾國秀上饒人咸淳元年知安溪縣始至即留心

教化修建學宮邑士慕之爲立生祠

江公望字民表睦州人舉進士紹聖二年知永春縣時百度廢弛公望至葺漏補弊剔蠹鋤梗不數月邑以大治其政明於大體凡事先之僚屬而稽其成故恒不勞而集嘗於所居隙地構亭一間扁曰多暇時携賓客飲酒賦詩其中若在事位之外者邑東五十里樂山西蜀隱者寓焉危坐不寐垂二十年公望重之每晨起坐邑治平遠臺遙望拜之又作歌招之其好賢忘勢如此在官多善政秩滿去民懷思之爲立生祠

黃瑀字德藻三山人紹興中知永春縣事時當寇亂凋瘵之餘首蠲宿負民有業去產存者悉釐正之輸賦後期則揭其姓名於市期日而至不使吏胥捕擾痛抑豪強所聽斷發摘如神卒亦歸於仁恕興學教士課試以時值旱則捐俸具牲躬走群望雨爲立應愚民私立塔廟輒治毀之丞有女病巫言其神爲崇瑀杖其土偶投之溪女病遂愈爲政廉明強介吏不能欺民不忍欺秩滿擢御史陳珙字子重仙遊人嘉定元年進士授永春丞時秤提楮幣守真西山檄珙行之區處有方民以無

擾後試教官科授西外睦宗院尋知永春縣屬庚寅汀寇焚蕩之後究心民瘼初朝旨蠲祖州縣以支吾窘迫不免奉行珙樽節月會杜苞苴之費積錢八十緡以補之民不知其賜

朱熹紹興二十一年任同安簿蒞官以教養爲先務革弊興利緩急有序一時從學者衆建經史閣作教思堂日與講論正學規矩甚嚴秩滿去士思其教民思其惠至今以斯邑爲過化之地其作述政蹟之詳具載于大同集

葉立志字仲愿仙遊人淳熙十二年爲南安尉縣

有死獄承檄往驗視屍無首人皆難之立志焚香祝天夜設榻屍側夢神告曰死者之首于溪北殺之者已遁於潮之小江其明發急詣溪北尋之果獲遂移文小江捕之見一人磨刃江側捕者詰之曰汝非南安殺人者乎其人驚怖及墜地遂擒之一鞫即服人稱其神

蕭里字元舉龍溪人力學好古以周禮名家登慶元二年第調同安縣尉一介不取當時有嗜學如飢赴義如欲之稱

石子重臨海人第進士授桂陽主簿調同安縣丞

時天旱民飢縣白府請蠲租太守怒檄子重杖主  
吏子重上記太守曰杖一吏細事耳然所係則大  
民今皇皇無以為命縱不能救忍箝其口乎守怒  
未已遣幕官往案驗至則布守意以為不當蠲子  
重爭益力部使者聞之因以委子重既行視歸即  
揭榜諭民蠲之什九且亟召鄉吏閉廨中使鄉為  
一榜戶列所蠲與其當輸之數既成立授里胥使  
走揭其所矯曰上官意也邑人德之  
方士端字德明莆田人以授室宗郎補登仕郎試  
吏部復授右迪功郎調同安主簿代朱文公文公

才之攝尉得盜當受賞棄不肯顧其節旣如此後  
遷知福清縣

黃彥輝字如晦莆田人宣和三年進士以奉議郎  
為永春丞知縣洪且德勝於才泉守趙鼎以且與  
彥輝易任且喜彥輝能代其煩彥輝待且益恭後  
權知晉江復知同安皆有政蹟

許廷彥字朝美莆田人紹興四年任永春尉俸祿  
不入私室屬草寇猖獗代者辭難廷彥尉永春凡  
四考百姓按堵民生祠之

宋文炳咸平四年為安溪尉攝令始建學校教化



以興邑人爲立生祠祀之

陳淳字安卿龍溪人少習舉業林宗臣見而竒之謂曰此非聖賢事業因授以近思錄淳遂棄其業而學焉及朱文公至漳淳請受教爲學益力文公語人曰吾南來喜得陳淳憂時論事感慨動人郡守以下皆禮重之時造其廬而請焉嘉定十年以特奏恩授迪功郎安溪主簿卒

鄭俠字介夫福清人治平中進士元豐間官監安上門以發馬迹上流民圖忤王呂編管英州元祐初蘇軾孫覺薦之起爲泉州教授泉士在造就者

節義相尚罷官歸篋惟一拂世稱爲一拂先生

許君佑景定五年主學正已率人有功學校士子德之爲立生祠

朱松字喬年婺源人監石井鎮抱負經濟耻於自售後胡世將撫諭東南見松竒之薦于朝調試館職

元

楔王立字世玉畏吾人元至正中監泉州時諸路兵亂王立築城浚河爲捍禦計興學校修橋梁賑貧之舉廢墜政蹟甚多文學亦偉郡士民立祠祀

之

迺穆泰字景春蒙古人至正末以延平路總管監南安縣時當寇亂調度轉輸以給軍餉勞徠綏輯以復流亡復以政暇修舉學校時稱良吏

林泉生永福人天曆進士任泉州經歷民逋酒稅械繫累年至有死者泉生以法諭船商使代償之歷官翰林直學士卒謚文敏

陳駭字玄甫至正中以學行薦補書院山長改潯溪場司丞時鹽法廢壞私販盛行民相挺易於爲亂駭招捕有方海瀕差安辟行中書省職官掾西

域那兀納等據泉州行省奉辭討之以駭嘗爲鹽官素得吏民心辟護軍參謀軍事駭請曰泉郡民皆良善特爲賊所脅耳請以檄招撫必獲其助時那兀納已肆掠興化道路梗塞駭以檄付從者問道以授縣尉龔名安等那兀納徵兵名安等佯許之帥舟師次東山渡以俟翌日駭等官軍至遂豎行省旗幟入城秋毫無犯那兀納就縛檻送行省因調駭爲晉江縣尹兼分督鹽課戢兵息民境內寧謐陞廣東鹽課提舉兼參潮惠循梅諸州軍事既而參政陳復代領諸州事遂翩然歸田道由泉

州父老懷其舊德固挽留之因家焉晚築南湖墅  
杜門謝事黃冠野服種蒔自給妻妾如其志年七  
十卒郡民爲祠祀之所著有方山堂集 舊志作  
寓賢但駭爲縣尹有政蹟當列官守項下且旣家  
泉亦非寓也

孔公俊字師道孔子五十三世孫至正間尹同安  
縣建大同書院于學宮之東以祠紫陽先生蒞任  
有政蹟

雷機字子樞建安人由進士至元間歷延平推官  
調知惠安縣爲人樂易和而不流嚴而不苛節浮

冗抑豪強均賦于鄉人無嗟怨陞湖廣儒學提舉

盧琦字希韓惠安人至正二年進士十二年知永  
春縣始至歲饑發倉賑貸罷橫征決滯訟警游惰  
興學校大得民和仙遊寇發適遇之塗望而拜曰  
此永春大夫也有君如此誰其忍負吾爲縣官所  
苦故至此耳琦立馬諭以禍福皆投棄又槩縛虎  
酋檻送帥府由是威惠行於境外十三年泉大饑  
民多扶携就食永春琦諭巨姓及浮屠食之十四  
年安溪寇發萬餘衆襲永春琦以義激其民皆感  
憤推鋒爭先擊賊大破之斬獲千餘賊遁去闔郡

賴以無事調寧德縣寧德寇發聞琦至即遠道時  
黃巾倡亂應者如響相戒勿犯盧使君境海寇執  
漁者詰其所居知琦隣也飲食而遣之後以近臣  
薦知平陽州既去民生祠之其學辯博文思豐贍  
所著有圭峰集

劉益晉江人良家子弟以軍功補官至正二十一  
年授晉江尉會大飢凶薊尤甚益首率仗義饋餉  
至于大都時西域那兀納等據泉州炮烙邦民以  
取貨財益設法贖之所活甚衆後所活者相率於  
西峰院爲益祝壽年八十四無病而逝

錢宗顯大德四年爲永春主簿時上司檄縣輸箭  
竹一節十握者三萬五千縣派昇平善化福德民  
蘇四里地非其產官吏畏嗔不敢辯沿例催督民  
甚苦之至大二年值宗顯督辦乃謀縣長申請除  
豁議久不決或者疑其難濟宗顯毅然自誓曰害  
若不除我去有遺恨辯明愈力延佑元年甲寅始  
獲俞允命下四里之民歡聲動地

林廣發龍溪人至正中授安溪學職邑僚師事之  
會寇作奉府檄招降以勞遷其縣主簿仍參謀軍  
府事每俘至委訊輒曰此平民也府帥問何以辨

曰獲於巢穴者為賊捕於井里者為民此俘皆自井里得之自是俘至多免死

雷燦字景星建安人領浙江鄉薦任泉州路塗嶺巡檢寇起舉義兵死之贈將仕郎主簿祀于府學尊賢堂今廢

國朝

李鳳大同人洪武中知泉州居官公清百凡興革民所信服徵輸期會不事督責而辦疏通河渠以便民尤重祀典循良之聲為昭代賢守冠

胡器新喻人以貢授普安軍民府通判洪武三十

一年擢知泉州始至革蠹弊課農桑修橋渡興學校獎勵學者歲時召父老令各誨其子孫每判死刑及徒配恒鬱鬱不樂或問其故曰吾不能化民故致此倉庫火風猛莫遏器向風稽首火遂滅有士劉孔宗當補伍試其文奇之送補郡庠遂登永樂甲申進士泉科第盛自器作養始歷官至國子祭酒

蔡錫鄞縣人永樂癸酉舉人以給事中陞知泉州廉慎勤敏孜孜為民均徭役興學校奏除洛陽東山大橋三鎮戍兵公私便之尤善摘伏時泉衛卒

悍城中居民放鴛東郊卒驅入其群競訴至庭錫  
問曰汝輩鴛以何時放卒曰早食時民曰某適放  
爾錫令民認鴛籠而置之日暮卒鴛矢草民鴛矢  
穀杖卒遣之自是卒不敢爲暴洛陽橋圯廢故石  
有刻文云石頭腐爛蔡公再來至是錫捐俸修之  
民祠于蔡忠惠祠畔歷官至大理卿

尹宏字克寬歷城人正統間知泉州廉正公勤深  
得民心卒于官民爲勒碑立祠祀之  
熊尚初南昌人由吏員舉授都察院都事正統末  
以薦知泉州剛梗廉勤時汀寇鄧茂七分黨侵掠

泉界鎮巡檄尚初監軍不旬日降賊殺百明年賊  
逼境請調衛兵未下尚初曰不可延寇殲吾城乃  
自提民兵與晉江簿史孟常陰陽訓術正楊仕洪  
拒戰于古陵坡兵力不繼被執賊欲屈之不可迫  
以貲贖又不可踞坐大罵遂與孟常仕洪皆遇害  
已而調兵至賊走去郡人立祠古陵橋西祀之正  
德中知府葛恒移祀城中名其祠曰衛民史旉配  
之

歐陽復桂陽人景泰辛未進士天順末知泉州廉  
明公恕事集而民不擾有媪訟婦不孝復問曰婦

不供饋乎媪曰無食者四餐復責婦曰汝何餓姑婦曰餓姑不孝雖貧何敢復陽怒叱曰尚敢言密令左右取桐油煎麵餅食媪媪食而吐皆白粲遂詈媪慰其婦而遣之在郡遘疾郡人競為禱神比卒哭聲遍閭巷為立祠與蔡錫尹宏並祀曰三太守祠

張濂越州衛人弘治間以郎中來守泉州廉潔雅正興利除害果於有為士民服而感之

張津字廣漢博羅人成化丁未進士初令建陽築城賑飢有異政正德四年以監察御史出知泉州

時逆瑾扇焰鎮舶私人絡繹下郡邑津以嚴重鎮之輒屏息以去政平而信吏不敢欺民訟無作誕者在郡三月瑾逐不附己者津與許進馬文升劉大夏皆矯旨為民百姓攀送塞道後瑾敗召用累官都御史

顧可久無錫人初授行人疏諍南巡逮繫嘉靖初起謫藉以戶部郎中出守泉州閑雅鎮定吏卒肅然歛畏其訓化小民慤慤然若父兄之教子弟政簡民安尤好學詩文醞藉先在詔獄時惠安張襄惠岳同繫見其詩慷慨瀏澆無悽惻聲遂與定交

云

屠倬鄞縣人以郎中出守泉州爲人修飭方正吏胥憚之無敢窺乘時各寺田爲豪家所有而賦役坐累寺僧倬悉取田券計畝派稅開給帖文逋者追田入官自此僧無負累以兄僑任福建布政使迴避去民甚惜之

俞咨伯平湖人初爲工部郎中以忤勲戚逮獄事白復官來守泉州性慈愷善拊循嘉靖二十三年春冬亢旱二十四年麥漸向熟復爲兩爛時值海寇警報船粟不通郡中飢之咨伯躬詣都里審第貧

戶差等發粟賑給又煮粥以濟尤急者招誘粟船每一商到即以花紅酒品就而勞之革攬糶禁侵尅賈人聞風相率繼至半月間米價歸平民賴全活者可數萬賊見賈船人衆以漸避散人謂一舉兩利至今誦之

熊汝遼進賢人嘉靖三十五年以刑部郎中守郡英敏明達果敢擔負郡飢亡賴民鼓衆強糶即下令大發倉廩以平米價倭夷由海岸突犯安平延南惠二縣侵逼郡城多方禦却城中有奸徒謀爲賊內應者以計擒除之督府提客兵萬餘戍郡糧



餉犒給器械百凡峻促從容支應多從節省有所  
不使輒持檄入白必得請乃已摧抑勢豪無所假  
借郡人帖服祠在城東門外碑記謂其政尚精嚴  
功多禦捍歷官南京右都御史

朱炳如字仲南衡陽人嘉靖己未進士以御史出  
守至則慨慕王梅溪真西山芳躅先教化而後刑  
罰集父老講明鄉約雖風雨不輟擇諸生才俊者  
談道論文士皆勃然自奮庚午鄉試一郡中式五  
十八人泉中人文一時獨盛居郡三載不以家累  
自隨惟兩僕供爨而已擢兩浙鹺使瀕行囊橐滿

條闔郡攀轅號送竟一晝夜不得行里許在浙中  
清約亦如在泉時累官終左布政使

丘浙南城人嘉靖乙丑進士以刑部郎中守郡天  
性朴茂布衣蔬食待士紳有禮見小民嘔嘔然惟  
恐傷之遇事執持確不可奪永春令某恣而墨先  
令解綬乃以聞于上官郡中有妖魅憑子姓煽惑  
愚氓立命夷其丘墓任滿不持郡中一錢擢山東  
副使歷官廣西總憲卒之日薄田數畝敝廬不蔽  
風雨郡人思之與前守熊汝達合祀曰二賢太守  
祠

董儀字尚質滁州人洪武中任泉州同知蒞官愛  
民禮賢下士郡稱賢佐卒于官貧不能歸櫬士民  
共塋于嶽祠之東

羅倫字彞正永豐人成化丙戌進士第一人授翰  
林院修撰以疏阻大學士李賢奪情忤旨謫提  
舉泉州市舶司倫自幼厲志聖賢之學及抗疏落  
職直聲震天下至泉有司率諸生從之講明正學  
時時迓寂岩壑間於南安片瓦巖特所心賞裴迴  
賦咏有仙家白晝應無夜玉樹長春未覺秋之句  
人至今傳誦焉未幾召還南京尋乞歸里居數年

卒嘉靖中御史聶豹于城北建一峰先生書院以  
祠倫而待學者今尚存

胡文宗廬陵人以鄉薦同知泉州性恬淡不競勢  
利操履古朴官舍止一僕與俱奉身之物雖寒士  
不能堪而處之裕如秩滿歸里不復出

丁一中丹陽人以戶部郎謫延平倅萬曆元年陞  
郡同知一中少受學于唐順之有文名來郡以文  
學飭治時引諸生講業性耿直不阿上官時朱炳  
如爲守政簡年豐公暇相與登眺吟咏境內名山  
一中題鐫幾遍焉字畫適樸有法人多藏之

楊一桂清江人丞郡九年宅心平恕未嘗枉罪一人沿海將士歲時餽送輒無所取擢潯州知府洪葆字子厚杭州人洪武三十年通判泉州居官廉謹性尤謙退善歸長官過則自引其咎遇名儒賢士必折節講論終日忘倦扶弱恤下如恐不及疾卒于官父老爲祠祀之

何克讚龍遊人以恩貢倅郡歷官四年謙恭勤慎未嘗少懈嘗出行遇中膳不備忍飢而過斷獄多主平恕不求深文左遷審理以去郡人惜之

歸大賓長洲人以貢士通判泉州天性長厚居官

秋毫無染署篆贖鍰分給貧生尤喜進士子談文無俗吏態居恒讀萬善同歸集刻于郡邸人謂其恬寂似之秩滿擢濟寧知州

業遇春太倉州人以進士司理于郡性最介特尚意氣所延接惟孝廉諸生每持藝文質正者至則款洽屏勢家干謁即上官授之意無阿徇也閱三載陞知州去實左遷云

羅文靖南昌人隆慶六年爲郡司理廉謹平恕恂恂儒者矩度郡有大姓爲不逞者以人命誣訟文靖廉其枉立剖之及遷秩行大姓感其德懷金餽

贖文靖峻卻之復隨至境外文靖曰理枉吾職也  
本無任受德矧受餽耶爾愛我厚何待我薄也聞  
者嘆服以爲視古四知無媿焉

習孔教廬陵人隆慶戊辰進士翰林院檢討沉毅  
方正爲時相所擠謫郡推官時郡中王恭質用汲  
以建言忤時相削籍家居相與往返講道論學尤  
精人倫鑒所賞拔諸生史繼偕劉弘寶潘洙李開  
藻常督課業皆爲名人時相敗召還歷官南京禮  
部侍郎

劉純仁字元之武進人萬曆壬辰進士授郡司理

純仁於吳士中夙有文名及蒞郡諸生多從問業  
純仁虛襟誨引不倦其治獄小大以情耻爲深刻  
當道甚器重焉以疾卒于官疾劇時屬邑致餽問  
猶手答峻卻其勵操如此祀名宦祠

徐瑛杭州人正統末知晉江縣廉慎寬平汀寇作  
亂寧陽侯統軍駐延平檄調晉江民兵瑛恐民心  
騷動躬詣軍門陳其利害得免及保定伯統軍至  
泉瑛從容酬應民無所擾邑人賴之

蔣濬新會人成化初知晉江縣蒞官勤慎事務利  
民獄非重犯悉遣之囹圄一清常祿外毫無所取

秩滿陞漳州府同知民懷其惠爲立去思碑  
朱綱字振甫曹縣人由進士嘉靖二十七年知晉  
江縣正身潔已推誠盡下小民疾苦皆得單詞詳  
達日與諸生講道論文士知其正直莫敢以私干  
者秩滿擢監察御史

錢之選字舜臣常熟人以進士知晉江縣性聰敏  
善摘伏兩造片言而決尤疆毅有執不爲權勢所  
撓監司駐郡公費舊倚辦晉邑里甲稱累爲請七  
邑均之海寇有警指俸募死士躬自操練寇聞遁  
去自奉修約嘗公出兩月餘計日蓄新米衙戶封

閉時進蔬肉則戶罅間一僮子尸之竟爲怨家所  
中調去士民留其衣冠祠之朝陽門外

盧仲佃字汝田東陽人嘉靖丙辰進士授晉江知  
縣爲政務恤民隱建白興除可垂永久安平舊無  
城爲經營新築深濶烏濤二巡司城垣剝壞悉爲  
繕完時倭寇猖獗軍興乏餉上司議弓兵加征洛  
橋置官權稅再三申豁民甚德之拾遺調去陳牒  
挽留者數千餘人立祠二一在郡東郭一在安平  
城

譚啓大寧人由進士嘉靖四十二年知晉江縣節

用愛民聽斷公平定催徵爲十限使民得寬其力  
郡人洪司寇朝選會督四川學啓試劣等及至修  
弟子禮甚恭後朝選爲巡撫勞堪誣害執送按察  
司獄啓爲副使詣獄中謁之遂解綬歸士論益重  
之  
羅名士光州人嘉靖乙丑進士授晉江知縣愷悌  
廉明銳意拊循小民議草夫保之編徵銀給驛官  
催其各鋪各村之夫悉編籍簿除縣印票外凡佐  
貳首領府縣房科不得擅役一人其省事使民類  
皆如此任九月以憂去民甚惜之

彭國光德化人由萬曆庚辰進士知晉江縣清修  
敏練事無巨細剖決如流時有分巡僉事恣睢酷  
虐國光與郡守鄒墀以凝靜持之士民賴以帖席  
第奉檄丈田溢額者一千四百八十頃人以爲苛  
瑕不掩瑜蓋廉能吏也擢戶科給事中歷官巡撫  
宣府僉都御史

應朝卿字行叔臨海人萬曆己丑進士初授建安  
縣以賢能調知晉江愷悌明敏小民得盡其情歲  
飢發廩捐錢多方賑恤災而不害積贖盈案剖決  
無滯稍胥不得當緣擢監察御史歷官按察使

余慶字原善新會人永樂中由監生知南安縣蒞  
官草奸弊均徭役修縣治興學校奏免崩堆海蕩  
賊米一千二百餘石以復流亡秩滿去民遮道泣  
留如失父母

張鐸博羅人知府津之父成化五年由監生知南  
安縣愛民禮士守法奉公省冗費均徭役民懷其  
惠成化十年疏乞致仕屆行民不忍別攀轅遮留  
鐸重違其意爲留數月而去

陳廷忠建德大成化十六年由監生知南安縣廉  
明果斷鋤強植弱吏民信服甚有治譽以疾卒于

### 官

黃濟字翊時臨川人弘治二年由進士知南安縣  
首興學校增選生徒時加考校訓誨尤切愛民省  
冗費復流移政平訟理修舉廢墜不勞民而事集  
公清廉小人莫敢干以私未滿秩以賢能召爲太  
僕丞百姓立碑以紀遺愛

洗文淵順德人正德四年由鄉貢知南安縣性方  
介不苟徇上以奸頑犯者無曲貸然其愛民出自  
真誠民心感之徭役賦稅皆以時會無後期者居  
官清苦食無重味衣無重襲冲約如寒士蓋素性

然云

唐愛字良德嘉定人嘉靖丁未進士授南安知縣性通敏善理繁劇紛錯盈庭暇如也興教化首繕學宮樹坊表開濬水利築鰲背大盈諸橋諸所修舉人咸便之本邑舊爲同安借編弓兵三百三十四名愛覈同安丁米皆詭寄鹽戶避重就輕貽累隣邑爲申請得減編三分之一歲派輸嘉禾倉米又爲申允折價擢兵部主事去邑人思之祠于潘山市

夏汝礪融縣人嘉靖己未知南安縣縣舊無城前一年爲倭寇所掠甚慘汝礪毅然以興築爲己任計田出直計丁出夫不二載而工完未幾土寇楮鐸作亂率衆攻城堅不可入因督兵挫之九日山下邑境賴以保全秩滿擢福寧州知州邑人因唐令舊祠望像並祀之

時執亮東平州人洪武辛亥由儒士知同安縣事廉明公勤以禮讓導民不事刑罰民宜而安之王琬華亭人永樂十八年由監生知同安縣下士愛民不避權勢陞通州知州張遜字時敏無錫人成化四年任同安知縣興學



校潔已愛民刑清政舉士民戴之擢知福寧州百姓遮道攀留有十數父老齎金數斤為贖不受送至三山復峻卻之邑人為立卻金亭

張伋諸暨人成化十五年知同安縣存心愛民政簡刑輕而事畢辦當道廉其循良將疏薦之卒于官民為立碑以寄思慕

宋敏中濟寧人洪武元年知惠安縣先是邑民為陳友定所殘暴敏中撫字得宜民以寧靖後卒于官

安景贊三河人洪武八年知惠安縣剛毅果斷判

決無滯民頌之曰安公蒞止視民如子不急不荒為邑之主秩滿陞蘇州府同知

閻宏安邑人由孝儒舉洪武十三年知惠安縣崇禮節尚文學田野闢吏案清民安訟簡卒於任

吳克剛上虞人由賢良方正舉洪武二十二年知惠安縣寬恕愛人政令公平清操推第一二十四年述職至京卒于途百姓莫不感泣

陳永年新淦人洪武末年由給事中調知惠安縣廉慎愛民邑嘗患蝗螟永年禱于城隍翌日鸛鶴蔽空而下捕食之其患遂息歲且豐

閉禎橫州人宣德間任惠安主簿克勤撫字秩滿以邑民留陞本縣知縣境有虎患禎募人捕殺之餘皆遠遁正統末鄰邑寇亂禎設險拒守邑賴以安立碑紀其德

王覽陳留人景泰七年任惠安知縣興學課農愷悌慈祥愛民如子天順二年亢旱苗枯損覽憂形于色齋潔蔬食祈禱山川於是甘霖霽霈其秋大獲次年禾稻將熟颶風大作仍祝于神其風遂息天順四年丁外艱去民爲立碑

康永韶祁門人成化間由監察御史謫知惠安爲

人簡易不事修飾而政事精明吏不敢期丙申大飢永韶多方賑濟全活者衆歷任二年調知順昌縣

張桓浮梁人由進士成化十八年任惠安知縣有幹才善與作從容辨理人不知費在任六年以太僕寺丞召

陳逅常熟人正德十四年知惠安縣操持廉介蒞事精明省里甲之費日止綱錢十文抑豪猾剔蠹弊吏畏民懷以才調省屬行取爲監察御史言事落職稍遷至福建僉事分巡福寧道嘉靖初年惠

安邑大飢迨發穀三百石賑之復禁鄰邑閉糴惠  
賴以活至今頌焉

萬夔新建人由進士嘉靖二年知惠安縣始至興  
建學校振飭文教自後文士彬彬科目日盛實自  
夔倡之為政持大體重先務一意撫字安靜不擾  
以才調閩縣民為立去思碑行取擢監察御史  
林咸番禹人嘉靖三十五年知惠安縣三十七年  
倭寇破福清南下悉力攻惠安咸晝夜登陴率民  
死守城賴以完越數日倭由海道寇鴨山咸統民  
兵討之戰亡贈府同知賜祀官其一子

葉春及字化甫歸善人上春官時詣闕上書三萬  
餘言授教閩清陞惠安知縣足馬入境采風謠詢  
民疾苦凡邑所困重役悉為申改官催徵納規則  
纖悉由盡八郡傳以為式審覈黃冊罷去里書令  
民以次列堂左右親供毀淫祠百餘區立社學講  
鄉約民有設祠醮及居喪用浮屠者召為講皇極  
孝經隱士康朔孝子王定民皆躬至其廬禮焉性  
孤稜不屑媚權貴人豪家斂手莫敢犯法上官行  
縣饋餉給七箸而已在縣四年擢賓州守軍民詣  
闕乞留不許忌者匿其檄令不得赴大計以逃中

之拂衣歸隱後以薦召用歷官戶部郎中所著有  
網齋集惠安政書肇慶諸志

鍾化民仁和人以庚辰進士授惠安縣慈祥恭儉  
糲食布袍無異寒士民有土田之訟必躬自按視  
挾一團飯一枯魚以行斷罪多從輕典接人詞和  
氣平而于謁者自不敢啓口政簡刑清三年覲行  
僅舊衣書籍兩篋後歷官巡撫河南僉都御史

戴玠潮陽人永樂三年任安溪知縣興學校課農  
桑招復流移一邑稱治

潘靖金華人正統二年知安溪縣恤孤獨抑豪右

流民來歸者甚衆邑大飢靖諭巨室出羨餘以賑  
貧乏多所全活後以入覲卒于京師民思之爲立  
碑以記遺愛

路亨當塗人正統八年知安溪縣居官廉慎寬以  
御民而加意學校士民德之

方汝榮字君實績溪人成化門由監生任安溪知  
縣蒞官清苦勤政愛民尤留意學校課業雖嚴而  
諸生悅服後以事忤郡長吏中以法當道察其廉  
能竟得釋憤悒成疾卒于福州邸舍士民大恚  
李銳豐城人弘治間知安溪縣在官以清慎稱奉

檄汀漳勾當公務卒于官邸囊橐蕭然邑人哀之  
黃懌蕭山人以嘉靖六年知安溪縣剛果善斷邑  
民弱素制于外邑勢宦懌至輒正以法由是豪強  
相戒斂迹每朔望集諸士講解爲文會課之又建  
社學設養濟院藥局義塚百度具舉歷任五年陞  
常州通判

夏建寅秀水人萬曆十六年知安溪縣廉明果斷  
任未暮月訟息蠹清不受私書強之則曰偽耳終  
不發封嘗以公事行村落自携乾糧鹹蛋不食民  
間一飯雖婦人童子亦知其不要錢也大察爲憾  
者中傷謫去兒孫步行從僕一二人行李蕭然邑  
人攀留者莫不出

溫琇新會人永樂中知永春縣勸農興學均役平  
賦嘗奏減歲造皮張士民德之  
杜任西安人宣德間以國子生知永春縣蒞政之  
日首詢民瘼先學校重教化學官有缺延碩士代  
教而躬課省焉政事精敏吏畏民懷以疾卒官囊  
無長物士民憫之

葉珠上饒人縣舊與德化縣置桃源驛國初罷凡  
送迎廩餼之需責辨里甲弘治初福州知府唐詢

奏請八府均勻藩司議以永德二縣田糧幫貼水  
口晉安康店等驛遣官督弁民幾變珠嘆曰先年  
牧長若王忠溫琇錢宗顯輩皆能減民歲辦以惠  
此方子獨弗能何司牧之爲再三申辦忤當道意  
遂上疏乞休當道感動乃除之民至今德焉立碑  
道左

柴鑣臨海人由舉人先任閩縣改知永春至則進  
父老詢利病明獄平賦剔蠹鋤奸邑之轉輸永寧  
軍者爲請改得輕折郵舍久廢議者欲復之力陳  
利害于當道事得寢汙廣流寇日逼近境乃選練

鄉兵躬環甲冑自花石嶺追至小尤中團凡十餘  
戰賊黨殲焉改建邑庠于白馬山時聚諸生課督  
境內淫祠悉改爲訓蒙社學延名儒修邑乘百廢  
具興六載擢汀州別駕去

劉三錫廬陵人嘉靖四十五年知永春縣遭寇亂  
後銳意節約公賦上供外凡加貼火耗常例一切  
剗革以賢能委攝晉江永民有訟牒兼而理之聞  
訃奔歸行李二三肩家人徒行士民遮送信宿乃  
別服闋改任陞本府通判永人喜躍迎之于家者  
數四竟高致不仕

梁道凝鄆西人萬曆五年知永春縣才諳明敏情  
僞至前瞭然洞矚邑有鉛礦聚衆蓄奸親詣封閉  
莫敢撓者戢隸役不得下鄉政舉民安晉江南安  
缺今借署多著異績以憂去任士民至今追慕焉  
王巽洪武元年知德化縣時承元兵亂之後公私  
彫弊規制草創巽至奮然振飭葺學宮修縣署建  
壇壝役民有方民忘其勞三年之間政平俗化議  
者以爲大統初集巽得修廢舉墜之體  
王貞永嘉人洪武九年知德化縣廉介古守愛民  
禮士政暇則彈琴賦詩而邑事用理有宓子賤之

風

馮翼德平人洪武二十六年知德化縣留心民隱  
先是以抽軍故人民逃移死絕者過半田蕪而糧  
額懸戶民賦不堪翼蒞官訪得其詳即以狀奏聞  
特蠲稅額至今民受其惠

應履平奉化人洪武末知德化縣廉謹平恕勸學  
獎士邑之登科第者自履平始尋遷吏部郎中一歷  
官按察使

何復柘縣人宣德元年知德化縣邑自應古之後  
不得其人百凡廢墜復循序經理未期年煥然一

新政尚簡易廉平正大善得守官之道爲當道敬重

陳宗全廣東人宣德十年知德化縣明恕廉介爲政有方立綱紀崇教化士民信服未期年境內大治

李青廣東人天順六年知德化縣政平恕人目以李佛子公餘襍履巡行郊野農事不勤者召而諭之矧望入學宮爲諸生講論終日無惰容百廢具興九年民修其業士修其學邑大治秩滿當去民奔告當道借留再任三年

任順常熟人正德間知德化縣性果斷多才每編賦稅徭役令下民輒稱便民有魯姓者好告訐號鵬兒素爲民患順化之以德久不悛乃寘之罪惻然遣之曰爾何不爲嘉禾而爲糧莠乎自是純用德教徃徃虛空

胡潛績溪人居官三年廉潔自持水利橋梁解署當修葺者恒割俸以助民力訟者使自省鞭朴不施於老逮繫不加于貧以奔喪去民相弔如失父母

緒東山馬平人嘉靖二十六年知德化縣有幹才



喜獎勸士類置學田建丁溪書院構駕雲亭復古  
義社邑人祀于龍湑山之麓

胡惟立高安人嘉靖三十二年知德化縣廉介自  
持常賦外不取加耗門隸久慣者去之刀健屢訟  
者懲之均賦役恤困窮邑人懷德卒于官廨共請

記名宦祠

張大綱龍川人嘉靖三十八年知德化縣前令鄧  
景武築城新就慮其低薄即經營改築適永春賊  
呂尚四等流劫攻城大綱身親督戰擒斬無遺自  
是上杭永福諸盜不敢犯境邑人立碑紀績

秦霽崑山人萬曆元年知德化縣經畫疆理動有  
心計學宮卑陋毅然遷造于城外大洋山之陽費  
不煩而事集諸生德之與前令緒東山並祠  
黃承讚義烏人萬曆丁丑進士先任武進抗忤權  
勢爲所中傷調德化縣恂恂勤修職業以邑中  
文風未盛修駕雲書院集諸生朔望會課爲面評  
其高下一時士類興起後武進事白陞南京刑部  
主事

顏賢高安人洪武初以秀才舉授泉州府司獄性  
溫良果毅郡人翁彥立繫獄通判胡釗以私憾授

意囊沙壓之贖正色曰彼罪不至死不敢聞命彥  
立獲免有興化卓六秀者與其黨八人皆有罪而  
獄未成一夕獄舍鄰火郡守欲坐以因火反獄而  
盡殺之贖力拒曰囚非反獄豈可厚誣况獄猶未  
成柰何殺之守慚而止囚獄貪餓者輒給以食每  
重囚引決必詣贖謝而後去

李德遂臨海人由進士洪武十九年任惠安丞性  
質純雅文辭雄贍蒞官勤謹撫下慈惠後卒于官  
葬縣北石鏡山之陽

劉珣器天順間任同安縣縣丞已祀在名宦祠江

西永新人出身政蹟俱無考而舊志中但云建置  
經畫多出其手必其才其守足信於人者也

劉佩峽江人由功生嘉靖十九年任惠安丞清介  
絕俗催科不擾前後丞尉皆不能及陞潼川州同  
知

王忠上海人洪武三十三年由人材任永春縣丞  
性聰敏吏事精勤蠲稅糧均徭役嘗奏革額辦段  
足民至今德之

余表化州人洪武末年爲德化丞奉職廉慎撫字  
有方役均訟簡民咸戴之卒于官郡守胡器爲遣

祭以旌其廉

段好禮平陽人由秀才舉洪武六年任惠安簿清操自勵一毫之賄未嘗受於民法令公嚴邑人信服後卒于任

古彥輝洪武三十三年為德化主簿性敏決精吏事識大體盡心於民不為苛察遷監察御史

梁崑新興人成化七年任惠安簿好學重儒設鄉學教民讀書人心悅服後以母憂去

楊榮山西人永樂十年任惠安典史性質剛直清操自持處貧窶澹如也知縣陳永年以其名薦于

朝部檄來徵未至卒于官

歐陽初字遂初潮陽人洪武中泉州教授其教先德行而後文藝大振頽風一時仕而出其門者多矜名節滿考改柳州卒

黃結字資友東莞人景泰間教授雅意作人槩範整肅泉士舊不習春秋結至始以是經授徒後遷長史卒

潘援字匡善景寧人正德五年教授性潔而介有文譽教諸生隨材成就歷陞國子監丞為祭酒所重陞中書舍人以老致仕

唐堯賓華亭人嘉靖間教授郡庠博學好禮善與諸生講論督學朱衡命主一峰書院教事所著有浩然堂間答郡人王叅政慎中爲序而行之秩滿擢上猶知縣

朱文簡字元可樂清人正德六年由舉人署晉江教諭學行醇美邑稱師道待士子有恩當道及泉大夫無不愛且敬者未滿秩陞增城知縣未幾以不能徇時好致仕去

霍球字廷獻南海人正德六年由舉人署晉江訓導性度夷坦行如其學每月按期課諸生以身率

之經年不倦與泉大夫士相過從講學之外無他及未滿秩陞湖廣武陵知縣

林騰鵠永安人萬曆二十二年任晉江教諭諸生贄餽一槩峻卻曰官以教爲名豈以貨取集俊秀講業循循不倦言動具有矩矱陞王官去諸生思之立碑學宮

包原明臨海人宣德元年由舉人授南安縣學教諭學問淵深訓誨不倦時廟學頽壞有司政弗及原明損貲勸義修建一新職教事乃有政焉秩滿陞江西吉安教授

陳思東莞人弘治二年由舉人任南安訓導學行  
充美誨引諸生甚勤畔其教者必峻責之性淡於  
利迨去任橐無餘藏

曹環巢縣人正德八年由舉人署南安教諭學有  
蘊藉教人務立根本不專以文辭課之諸生相慶  
以爲得師於義利之辨尤嚴室屢空晏如也在官  
踰年卒士類惜之

李深四會人嘉靖三十六年南安訓導端執率物  
士之貧者指俸以助善大書有求者輒書改過爲  
善四字與之

區鶴鳴南海人隆慶五年以舉人署南安教諭愷  
悌作人士類愛敬署縣篆半載不染一錢陞樂地  
知縣至假貸以爲行資云

章文仁和人宣德元年由舉人任同安縣學訓導  
爲人持重不苟其教以身先之課文崇典則抑浮  
靡後累官南京禮部尚書兼太常寺卿

陸佶鄞縣人正德間由舉人任南京刑部司務謫  
同安教諭律身以正教導有方同士敬而慕之

劉觀寧波人由舉人成化二十二年任惠安教諭  
朴實嚴重勤於教導有古君子風後卒于官諸生

至今思之

周一陽海澄人教諭惠安究心理學詞辨充暢每登堂講論四坐開心巖巖之氣分毫莫犯遷儋州學正棄官歸隱

鄒魯南海人由舉人正德間教諭安溪博學工文雅重道義表彰先賢善誘後學嘗著有文集一時士論重之

呂嶽興國人嘉靖三十九年任永春訓導師範端方重義輕利土賊謝愛夫等瞰永春城初完兵少糧乏率倭屯留灣造梯車攻城嶽捐俸犒衆以死

拒守密遣人約諸寨救援時出精兵相應殺賊又命僕執火藥突出焚車車中火藥暴發賊多焚死因解圍去後爲同僚所忌以察罷官邑人惜之饒自成廣昌人教諭德化方正儉約誨諸生如子貧者恤之捐俸修理祭器志尚清雅當道敬重張泮東莞人嘉靖十三年德化訓導持身廉謹課士有方見學宮圯壞捐貲修葺莆人吳從龍爲之記

官守外傳

凡有官守者夫有所受之也唐季五代海寓分崩

王氏奄有閩疆自克泉州始留陳兩節度乘時起  
事自稱留後然其保境安民績有可紀者嘉靖志  
傳爲藩鎮今爲立官守外傳

五代

王潮字信臣光州固始人兄弟三長即潮次審知  
審邽唐末壽州盜王緒攻陷固始召潮兄弟置軍  
中以潮署軍正主廩庾士推其信緒爲蔡州秦宗  
權所攻率衆南奔自南康入臨汀陷漳浦緒性猜  
忌部將雄才魁梧者皆以事殺之衆懼次南安潮  
與其前鋒將選壯士數十人伺緒擒而囚之緒自

殺前鋒將曰生我者潮也推潮主軍務是時泉州  
刺史廖彥若爲政貪暴泉人苦之聞潮畧地至境  
軍行整肅奉牛酒遮留潮即引兵圍彥若克之光  
啓二年福建觀察使陳巖表潮泉州刺史遷爲觀  
察使作四門義學還流亡定賦歛遣吏勸農人皆  
安之

王審邽字次都乾寧間權泉州刺史累授至司徒  
間國伯在政十二年喜儒術通春秋善吏治流民  
還者假以牛犁完其廬舍公卿避亂來依遣子延  
彬作招賢院禮之如楊承休韓涯鄭璘鄭戩楊贊

圖等皆賴以免禍

宋

留從効永春人幼孤事母兄以孝悌聞好兵法仕  
僞閩爲泉州散指揮使晉天福末閩將朱文進殺  
王延曦署其黨黃紹頗爲泉州刺史從効謀復王  
氏募死士陳洪進等二十五人擒紹頗斬之立王  
延政從子繼勳爲刺史未幾延政降于南唐李景  
從効亦執繼勳送款李景建泉州爲清源軍授從  
効節度泉州觀察使從効性勤儉知人疾苦常衣  
布素置公服中門側出乃服之罷賦歛之無名者

每歲取進士明經謂之秋堂王氏有二女嫁爲郡  
人妻從効奉之甚謹資給豐饒累遷特進兼中書  
令封晉江王從効雖稱藩南唐及唐紫金山之敗  
密送款于周宋初又假道吳越入貢世宗太祖皆  
納之從効無子子紹鏐紹鏐皆兄從願子及其卒  
從願守漳州紹鏐齎表金陵紹鏐嗣事牙將張漢  
思陳洪進等執紹鏐送金陵漢惠自稱留後洪進  
爲副使

陳洪進泉州仙遊人幼有壯節頗讀書習兵法及  
長以材勇隸兵籍從攻汀州先登補副兵馬使與



留從効誅黃紹頗有功授本軍馬步行軍都校及從効節鎮清源洪進爲統軍使與副使張漢思同領兵柄從効卒少子紹鑑典留務月餘洪進誣其將召吳越人以叛執送金陵推漢思留後而已副之漢思年老不能治軍事皆決洪進漢思欲圖之洪進覺一日偵漢思處內袖巨鑰直入府中及鎖其門使人呼曰郡中軍吏皆屬心陳君丞與印漢思猝不知所爲出印門隙洪進遷漢思別墅而自領軍事請命于李煜時宋太祖平澤潞下揚州取荆南洪進心懼遣牙將魏仁浦間道奉表納款太

祖遣通事王斑齎詔撫諭乾德二年改清源軍爲平海軍授洪進節度檢校太傅洪進每歲修貢多厚斂於民弟民貲百萬以上者令差入錢以爲試協律郎奉禮郎免其丁役及江淮平吳越王入朝洪進不自安遣子文顯入貢太祖召入覲未至太祖崩歸鎮發哀太宗即位加檢校太師明年入朝表歸漳泉二郡乞授別鎮詔嘉納之以爲武寧軍節度使同平章事留京師諸子皆授近郡賜白金萬兩各令市宅六年封杞國公改岐國雍熙二年卒贈中書令謚忠順

右宦蹟所紀宋史具在間有旁搜補遺者迄于昭  
代則嘉靖隆慶二志備矣悉仍其舊無所更改自  
隆慶後四十餘年皆躬逢目擊聞見頗真傳之非  
私德遺之非私憾即瑕瑜不掩據事直書終不失  
其令名蓋竊附三代直道之民誰毀誰譽如此

泉州府志卷十一

武衛志上

詩禮鞞鈴均效國家用也清平之世誰能去  
兵居有蒐閱之典行有杖仕之勞而將實統  
之或振纓世曹或奮蹠草野得之非易需之  
甚殷頃歲山海寧謐其狎戈矛饒壽略預桑  
土之綢繆者亦惟上所驅使焉作武衛志第

六

昔無諸率旅佐漢始開閩越唐光啓間廖彥若守  
泉王潮擁中州勅兵攻圍閱歲餘僅廼克之區區

閩海之衆以戰以守自有餘銳宋初收天下精壯  
爲禁軍留本州鎮守者爲廂軍禁軍就糧各州者  
仍禁軍之號泉有澄海威果全捷廣節指揮名號  
時迭更易營地各有屯駐大約額軍三千二百有  
奇而壯城牢城指揮所統不與馬額軍之外有諸  
寨土兵晉江石湖惠安小兜南安石井潘山德化  
雲峰里計戍兵一千五百有奇又有諸縣弓手隨  
產戶催募計三百八十有奇嗣後海寇告警始置  
水灣寶林法石三寨各有屯戍以殿前司左翼帥  
領之嘉定間海寇犯圍頭守真德秀請增法石兵

至二百人而移寶林兵百二十人戍圍頭立寶蓋  
寨其正將則建牙法石諸屯並聽命焉自是修戰  
艦勦營房法日益加密至元時調揚州湖州軍戍  
泉厥後廼設萬戶府與土軍相參亦知用客兵之  
非策也

國朝洪武初以郡治建泉州衛旁列五所已廼城水  
灣爲永寧衛城小兜爲崇武所城廈門爲中左所  
復於大擔南大武山外建浯嶼水寨扼大小擔二  
嶼之險絕海門月港接濟之奸與福州烽火小埕  
興化南日漳州銅山聲勢聯絡其爲全閩計甚周

先年烽火南日二寨移入內灣浯嶼寨復移廈門  
縱賊登岼而後禦之無及矣嘉靖戊午浙江舟山  
倭從巢梅柯復駕舟出海泊于浯嶼負嵎莫撓四  
出剽掠興泉潮廣並受其害越一載廼揚帆去此  
已事之啟鑿也譚巡撫綸總兵戚繼光議請復舊  
旋復旋罷近又移浯嶼水寨於石湖說者謂濱海  
四郡隔藩籬而懷醜毒原非使計廼石湖則於內  
地尤近置鯨波若罔聞矣僅亦一長慮平至于鄉  
兵之設即宋人置土兵弓手遺意維時瑟絃方急  
難以膠柱而獨募土著省容兵則于今可高略云

今將營房水寨官兵哨船信地開列于左其衛所  
屯田詳見版籍志不具列

營房

泉州衛左千戶所營六百三十間在舊通淮門內左右沿城  
右千戶所營七百一十間在東門內左右沿城 中千戶所  
營七百一十二間在仙門南門外及水 前千戶所營  
六百九十間在漳門西門外及臨 後千戶所營七百  
七十間在北門左  
永寧衛左千戶所營八百五十間在海寧門東街  
右千戶所營八百四十間在永清間西直街今

中千戶所營八百四十九間在東瀛門東南街今存一百零八間

前千戶所營八百四十間在金鰲門南街今存一百一十間

千戶所營八百四十九間在玉泉門北街今存一百二十九間

全千戶所營八百五十三間在本所 金門千戶

所營八百六十間在本所 高浦千戶所營一千

二十五間在本所 崇武千戶所營九百八十七

間在本所 衛所旗軍

泉州衛統五千戶所原額操海屯種等旗軍共六千一百四十七名除以前逃亡事故外今見在食

糧操海旗軍餘紀一千二百三十六名屯種旗軍三百四十四名

永寧衛統附衛五千戶所原額操海屯種等旗軍共六千九百三十五名除以前逃亡事故外今見在食糧操海旗軍一千三百九十四名屯種旗軍七百八十三名

福全千戶所原額操海屯種等旗軍共五百七十五名今見在食糧操海旗軍一百一十六名屯種旗軍一百一十七名

金門千戶所原額操海屯種等旗軍共一千五百

三十五名今見在食糧操海旗軍六百一十八名  
屯種旗軍七十四名

高浦千戶所原額操海屯種等旗軍共一千二百  
五十八名今見在食糧操海旗軍五百八十八名  
屯種旗軍二百單一名

中左千戶所原額操海旗軍一千二百四名今見  
在食糧差操六百八十四名

崇武千戶所原額操海屯種等旗軍共一千二百  
二十一名今見在食糧操海旗軍六百單二名屯  
種旗軍一百九十四名

隆慶志云國初泉永二衛尺籍有歸附軍有投充  
軍有謫發軍有改調軍或為正管軍或為帶管軍  
共萬二千有奇比制額過之其訓練歲二月中旬  
至夏至止七月中旬至冬至止出海備倭以中下  
班更迭月支亦有定制石二斗為軍總旗八斗為  
差操正軍加行糧四斗為出海備倭軍六斗為隻  
身紀錄軍三斗為老幼存卹軍三分守城七分屯  
種糧出於所種田而以餘糧輸官為不支糧屯軍  
本府原派廣平等七倉秋屯鹽本折色九萬四千  
有奇亦定制也民出穀養兵兵荷戈衛民兵食俱

足民亦不困太平日久軍政不修逃故日多清勾  
無法於是所存視制額僅五之一化因失額操因  
缺伍及至有事時廼抽選軍戶以兼團練謂之餘  
丁軍招集市井無賴謂之募兵調於各省謂之客  
兵又增派民戶丁糧於舊制外以爲一鄉防守謂  
之民兵與鄉兵兵增於衛所之外餉增於本折之  
外皆一時權變非國家經常之規矣足食足兵修  
舉振飭必自查復舊制始

### 民兵

洪武初立民兵萬戶府簡民間武勇編成隊伍以

時操練有事用以征戰事平復還爲民有功者一  
體陞賞正統十四年命本地官司率領操練天順  
元年命鞍馬器械悉從官給弘治二年選取民壯  
須年二十以上五十以下精壯之人州縣七八百  
里者里二名五百里者里三名三百里者里四名  
一百里者里五名春夏秋月操二次至冬操三歇  
五六年令官司私役民壯者以私役軍餘例罪之  
嘉靖年間先後通減本府實存機兵一千四百六  
十六名每名工食銀  
七兩二錢隆慶以後復通減扣工食  
充餉今見在機兵七百三十名 晉江縣九十名

舊教場在縣北  
南安縣一百二十名舊教場在縣治西里

花營後今廢同安縣一百八十四名舊教場在南門外里許今廢

惠安縣一百四十名舊教場在外里許今廢安溪縣八

十名舊教場在縣治南今廢永春縣八十名舊教場在馬山下今廢

德化縣八十名舊教場在致齋所今廢嘉靖三十七年

該都御史王詢又行令七縣添設鄉兵專備城守

共八百四十六名今裁革機兵額設工食選驍勇

掌印官提督操演儘可得其用命鄉兵無有工食

養之無道教之無素強令操戈實滋擾害正德間

王太司馬瓊疏可考弓兵

本府設晉江等縣各巡檢司共一十九處額編各

司弓兵共一千六百五十名每名工食銀七兩二錢嘉靖三

十九年奉文每弓兵百名內裁減三十名扣銀解

布政司充餉四十二年又奉文裁減每巡檢司只

留一十二名後又奉文有併司裁革者今本府各

縣只存哨探盤詰弓兵共一百六十六名晉江縣

圍頭烏潯祥芝深滬四巡檢司各原設弓兵一百

名今存各一十八名共七十二名南安縣灣頭巡

檢司原設弓兵三十名今存一十八名同安縣官

灣田浦峯上陳坑高浦塔頭烈嶼七巡檢司各原



設弓兵一百名今田浦陳坑二司裁革塔頭改設  
白礁官澳司今存三十二名峯上司今存三十八  
名烈嶼司今存一十九名白礁司今存一十四名  
亭溪巡檢司原設三十名今併司裁革惠安縣峯  
尾獺窟黃崎小岞四巡檢司各原設弓兵各一百  
名今存各一十八名共七十二名安溪縣源口渡  
巡檢司原設弓兵六十名德化縣高鎮巡檢司原  
設弓兵三十名今俱併司裁革

隆慶志云洪武至正統年間經畧諸臣江夏侯焦  
侍郎等官自福寧州以遠漳泉置衛所共二十五

巡司四十有五水寨五處衛所巡司以控賊於陸  
水寨防之於海則知巡司衙門雖小而與水寨同  
時建設所以聯絡聲勢保障居民也邇年兵餉缺  
乏扣銀解充似亦一時不得已之權今海防無儆  
生齒日繁彼處離城寫遠則流官彈壓與弓兵防  
守皆似難免者况土民魚鹽爲生慣習風濤尤堪  
水戰飛石放鏢迺其長技近年屢與賊鬪賊亦畏  
之若以弓兵工食就彼招募土民籍之于官且耕  
且守禁其剋削作其銳氣卽勝兵千餘不召而集  
恐客兵不及也

客兵

閩中陸設衛所海立水寨皆係本地官兵原無客兵名目自嘉靖李年都督戚繼光用浙兵勦倭寇著績嗣而撫按請設叅將遊擊等官帶領各處客兵來去不常至隆慶四年院道議募浙兵一營題設名色把總一員哨官四員招募客兵陸百名劄守府城就東門外城邊起蓋營房百餘間居之至萬曆二十年海上有警院道又議添新浙兵一營亦題設把總一員哨官四員建營房百餘間在北門外以舊營是在者就中裒益每營各額定

五百七十五名至萬曆三十三年以餉誦裁減每營官兵定以四百五十員名為率內把總一員日支銀一錢哨官四員日各支銀七分哨長高招一十七名日各支銀五分隊長書記四十九名日各支銀四分把總家丁二名健步二名四哨官家丁健步各一名兵夫雜流三百四十七名日各支銀三分三釐每營每月約支糧銀四百六十兩有奇俱派在本府七縣徵給至於春冬二汛舊營分兵二哨守料羅一哨守安海一哨守圍頭兼顧福全一哨守府城近議以安海為泉郡門戶奸盜出沒之藪題設專官駐鎮其地防守宜亟

而圍頭尚在福全內地且有浯嶼寨右哨兵船在  
圍頭洋捍衛于海無有巡司福全所犄角于陸議  
將圍頭一哨陸兵掣撤添守安海其新營二哨守  
崇武一哨守永寧沙堤一哨劄守府城

### 水寨官

舊制水寨統以指揮一員謂之把總嘉靖四十二  
年軍門譚綸題奉 欽依比照浙江定海等關把  
總以都指揮體統行事於是浯嶼寨為欽總其浯  
銅遊兵把總及萬曆二十五年新設澎湖遊兵把  
總俱軍門劄給名色者

### 水寨軍兵

舊時水寨舟師皆撥各衛所軍南日寨則撥泉州  
衛合興化平海二衛共一千五百餘人浯嶼寨則  
撥水寧衛福全所合漳州衛共二千五百餘人如  
隆慶志所載是也近來軍伍缺乏寨卒悉係募兵  
而衛所軍止貼駕船浯嶼兵一千七十名糧每月九錢布  
政司貼駕軍五百八十名浯銅遊兵五百三十六  
名糧俱布政貼駕軍三百名澎湖遊兵八百五十  
名春汛糧支給于泉  
冬汛糧支給于漳  
兵船

浯嶼寨管福哨冬鳥等船四十八隻浯嶼遊管冬鳥等船二十二隻彭湖遊管哨船二十隻按福船勢力雄大最便衝犁所以扼賊船於外洋事久備懈皆放賊船入港始議迎擊港中山灣崎嶇賊船窄小反易趨避而大船轉動多礙皆為無用之器故寨中有福船又有次號哨船冬船以便攻戰小號鳥船快船以便哨探或助力襲擊如福船出洋犁賊賊船勢將內逼哨冬船與鳥快船急搶上風又出賊船之內向外逐打務逼使出洋內外夾擊收功如一槩從外追打逼賊登岸具有軍

法

信地

浯嶼寨兵分四哨出汛時一屯料羅一屯圍頭一屯崇武一屯永寧每汛與銅山南日兩寨及浯銅遊兵合哨稽風傳籌浯銅遊兵分二哨出汛時一屯舊浯嶼一屯擔嶼每汛與浯嶼寨兵合哨惟彭湖遊兵專過彭湖防守凡汛春以清明前十日出三個月收冬以霜降前十日出二個月收收汛畢日軍兵放班其看船兵撥信地小防按泉郡濱海綿亘三百里與島夷為隣其最險要

宜防之地有三一曰崇武在惠安之東北接湄洲  
與興化連界西通泉州大港東接海洋南與祥芝  
對峙正當泉之上游海寇入犯首當其衝一曰料  
羅在同安極東突出海外上控圍頭下瞰鎮海內  
捍金門可通同安高浦漳州廣潮等處其灣寬大  
可容千艘凡接濟萑苻之徒皆識其地以爲標準  
嘉靖間倭寇由此登岸流毒最慘一曰舊浯嶼在  
同安極南孤懸大海之中左連金門右臨岐尾水  
道四通廼漳州海澄同安門戶國初設寨于此最  
爲遠慮至崇武而南有永寧料羅而上有圍頭舊

浯嶼之北有擔嶼烈嶼南有卓岐鎮海皆海寇出  
入之路抑其次也今汛兵屯崇武永寧分哨則獺  
窟祥芝深滬福全一帶有賴屯料羅圍頭分哨則  
浯洲安海官澳田浦峯上陳坑一帶有賴遊兵屯  
舊浯嶼擔嶼巡哨則鎮海岐尾烏沙港一帶有賴  
澎湖絕島舊爲盜賊淵藪今設有遊兵防守則賊  
至無所巢穴又泉郡藩籬之固也廼若選將校核  
卒伍修艦艦明賞罰使水軍狎風濤而不敢偷安  
內灣則在人而不在地故曰地利要矣人和急焉

寨隘  
烽燧附

晉江縣寨十有七北曰萬安洛陽橋惠安縣分界南曰潘徑

十都隸東南十有五曰吳山曰中寨曰坑尾曰沙

堤曰新寨曰尾寨曰古雲曰沙浦曰倉後曰東店

俱二都曰龍婆曰湖邊曰東浦曰深蘆曰龍尾俱二

都隸永寧衛隸烽燧十有二西曰安平隸福南曰龍坡

曰古雲隸永寧衛曰坑山十六都曰東門外曰洋下

十五都曰陳坑曰石菌曰潘徑曰塩埔曰石頭曰蕭

下隸福全所南安縣寨無烽燧四西南曰石井三四都曰溪東

四都曰街內曰下吳隸金門所

五都

同安縣寨十有四浯嶼為海防重鎮另志見前東曰劉

五店灣頭八都曰牛嶺曰穢林俱三都曰歐山五都

西曰青崎山曰洪山七都曰西山一都曰天寶九

都隸洪武二十一年西南曰下崎曰大員堂曰馬鑾

俱十隸高浦所曰東灣曰五通俱二左所烽燧

十有四南曰白石頭十都曰劉山曰西蘆上俱十

隸高浦所東南曰葉了金門所北曰東關浚曰亨泥

俱四都西南曰廈門曰歐舍曰徑山二都曰東

渡曰下尾曰流礁二都曰井上曰龍淵俱隸中左

所

惠安縣寨四北曰白水在白水鋪南一名陳同元

統年知縣閉頑西北曰東坑在日曝嶺西南曰虎

重建兵守之徑僅通人行崇山東南曰青山洪武二十

一年建隸崇武所湧有五曰崇武曰獺窟曰小岞曰黃

崎曰峰尾俱有城壘烽燧二十二東北曰海頭

六都曰下頭七都曰後黃曰峰尾俱八曰大山曰

高山俱九曰蕭山十都曰爐頭曰下朱俱十曰後

任三四都曰白沙十九都東南曰白崎二十都曰柯山十二

都八曰垵埭曰小岞俱三曰尖山一三都曰青山曰馬

頭俱隸崇武所

安溪縣寨二曰白葉坂在縣崇信里嘉靖二十六年

往來經此僉事余壙請建圍以石城發泉州衛千

戶一員領軍二百及弓兵一百名戍守其地今廢

曰磐宗寨在新溪里隘十有一曰東嶺在依仁里

曰典林在崇信里正德十年曰眷田龍涓里正德十

建曰大深感德里弘治四年曰磨鎗新

里曰打鼓蘇里嘉靖三年曰磨鎗康

溪崇善曰燕尾龍涓里俱知曰鰲頭崇信里軍寨

彭黃建曰白泥長泰里曰桃舟感德常樂二里

今廢地界盜賊往來之地最為關係

永春縣寨二十七曰南峰在龍坑一都曰占仔在占隔一都

曰碧溪在一都柴鑣征尾村嘉靖二年修築曰蝴蝶在村三曰

金鷄在村北曰石鼓在村仙曰陳坑在村曰山中在上

下二寨在村曰龜洋馬頭在村曰大模在村

邊村曰陳巖在巖口清泉四出朝蕭安六建路昔險

蕭姓者傾貲間以通龍尤二縣憑虛架石下臨深

谷傍有石崖刻主簿錢顯宗去思碑舊志誤載陳

改正山曰道場在極高麗山之巔勢曰雙魚在頂以留灣山

後曰銀瓶在十一都石壁有清泉曰陳占在石谷山

雙魚曰王山在縣鐘四都曰陳占在石谷山

深廣莫測昔有劇盜陳占據此虎食興泉二郡郡

曰湖安在湖曰白鶴在環障清泉四出正統十四年

敬德兒修築賊首陳曰石壁在洋村曰覆船在蓬

橫山在溪曰貓巖在二山兜二村曰磁窰在村曰

苦崎在田地曰河坂在二村張林在二山前山下

隘二十二曰樟坑在路通漳平山下曰任田在路通

尤溪曰白山嶺在東湖山下曰吳畬在東山下

在白石巖曰蘆地在嘉靖二年知縣柴鑣建此曰呂平

山曰山中在七都曰許平在都西柴鑣建此曰高平在路通

洋頭曰山中在七都曰許平在都西柴鑣建此曰高平在路通

打鼓嶺知縣柴鑣建此曰高平在路通

龍徑嶺頭在嶺曰西向嶺在嶺曰泥門在都自巖



橋北已上二隘曰東關在都北曰梅坑在都北曰塔嶺在都北  
俱知縣柴鑣建在都北曰石獅山在都北曰頭隘在都北曰蘇  
口苦竹在都北曰白隔在都北曰蘇  
坑英山在都北知縣柴鑣建在都北曰蘇

德化縣關四曰官井關在楊梅曰湯尾關在湯泉下曰

巖市關在楊梅曰平盧關在楊梅隘十有三曰蘇坑

隘在楊梅曰劇頭隘在楊梅曰蓋福洋隘在楊梅曰

上際隘在楊梅曰石門隘在楊梅曰湯嶺隘在楊梅曰油竹隘在楊梅曰

大官曰蛇嶺隘在楊梅曰蕉嶺隘在楊梅曰長安隘在楊梅

隘在湯泉曰赤嶺隘在湯泉曰蕉嶺隘在湯泉曰長安隘在湯泉

在黃團曰伏虎隘在湯泉上萬豐巖至元以地接汀  
縣交接處最要

按泉郡西北負山安永德三縣與汀漳延平為鄰  
各處逃民間作不靖先年在在設有寨堡或遏賊  
所必由或守賊所必據其建立防守大抵出於民  
為多東南瀕海接近島夷晉南同惠諸寨皆為備  
倭如圍頭烏潭深滬蚶江等灣其土民慣戰海賊  
所畏兵亦賴之嘉靖季年倭寇充斥村落之民多  
以寨墜人強得免者承平以來各寨董存其名適  
年巡撫朱徐二公會屢行申飭各鄉都築堡防虞

然上有經營之勤常患於民不可使知下有出辨  
之繁常苦於官不能盡亮非蚤計而預築不得堅  
完然無故而興後又涉謗端自非瞭若觀火憂切  
桑土之長孰能曲突徙薪於必然而未然之際哉

十乙卷

此卷之末有...

